

雪履尋碑錄卷九

清宗室盛昱集錄

皇帝諭祭故湖廣布政使王定國之靈鞠躬盡瘁臣子之芳蹤卹死報勤國家之盛典爾王定國性行純良才能稱職履任服官歷有年所方冀遐齡忽焉奄逝朕用悼焉特頒祭葬以慰幽魂嗚呼聿垂不朽之榮庶享匪躬之報爾如有知尙克歆享康熙三十年二月二十九日禮部祠祭司員外郎禪齊布祠祭員司員外郎索爾璧儀制司員外郎阿爾達讀文致祭

奉天承運皇帝制曰褒忠表義昭代之良規崇德報功聖王之令典特頒恩命以獎勤勞爾頭等侍衛下一壯尼太佐領□參領仍加一級達賴秉心謹飭臨事敏勤簡居侍從之班克稱儀衛之職朝夕匪懈指使無違旣以□勞□膺上秩屢逢盛典宜被新榮爰煥寵章益

資効力茲以覃恩特授爾階資政大夫錫之誥命於戲恩推自近迺
弘獎夫崇階業廣惟勤尙克舉夫寵錫欽予時命勵爾嘉猷頭等侍
衛下一壯尼大加參領兼佐領事達賴妻那喇氏克勤內德宜爾室
家眷良臣靖共之猷賴淑女匡襄之助茲以覃恩封爾爲夫人繼妻
覺羅氏嗣持壺政克相夫綱茲以覃恩封爾爲夫人繼妻關氏黽勉
同心德愈內著茲以覃恩封爾爲夫人今奉皇帝誥命勒碑康熙三
十年歲次辛未三月初一日立

康熙三十年三月二十三日皇帝遣禮部員外郎賴道諭祭陣亡護
軍參領自得拜他喇布勒哈番富成格之靈曰鞠躬盡瘁臣子之芳
踪卹死報勤國家之盛典爾富成格賦性忠勇才能稱職捐軀報國
効力師中奮不顧身力戰陣歿朕用悼焉特頒祭葬以慰幽魂嗚呼
聿昭不朽之榮庶沐匪躬之報爾如有知尙克欽享

奉天承運皇帝制曰位列崇階作忠由於移孝業隆嚴訓資父所以
事君念茲堂構之貽厥有絲綸之賁爾羅多禮乃議政大臣戶部尙
書佐領鄂爾多之父躬裕懿修世推淳德澤流弓冶裕家聲於庭闈
慶衍門閭亮天工於邦國令名允稱殊典庸加茲以覃恩贈爾爲資
政大夫議政大臣戶部尙書佐領錫之誥命於戲一經迪後式傳報
國之忱七命沾恩益著象賢之美欽予寵命丕佑來昆康熙三十年
四月

副都統佐領諡敏壯阿爾虎碑文先登破敵戰勝攻取此武臣之事
也其或効節疆場見危授命揆諸臣子致身之義亦庶幾焉爾阿爾
虎職業無愆□使克稱始出師於關隴已奮戎行繼討逆於衡湘復
襄閩寄志期敵愾義切同仇方殫力於馳驅遽隕身於行陣逖稽載

籍死於王事者則厚卹之能執干戈以衛疆圉則春秋予之睠懷匪躬之臣爰賁易名之典是用錫之葬祭諡曰敏壯嗚呼艱險不移知貞心之未泯戰陣能勇思烈氣以如生□被榮名足慰勞臣之魄勒諸堅石永激壯士之肝康熙三十年七月十日

奉天承運皇帝制曰物本天而人本祖誼重所生忠於君者孝於親恩推自近觀貽謀之式穀信繩武之多賢爾趙一鶴乃鑲紅旗漢軍都統佐領趙璟之祖父仁心垂裕令問宣昭鍾美厥孫衍箕裘於再世繼承乃祖聚簪紱於一門茲以覃恩贈爾爲光祿大夫鑲紅旗漢軍都統佐領錫之誥命於戲樹德百年彌表善餘之慶榮邀七命益宏佑啟之模爰被徽章永膺榮寵制曰家慶蒙庥善必歸於大母朝章錫類恩亦逮於重闈載揚闡之儀用著本源之義爾鑲紅旗漢軍都統佐領祖母陳氏履豐守約處逸思勞翟弗爛然釐爾子孫之貴

縞衣猶在利爲家人之貞茲以覃恩贈爾爲一品夫人於戲副筭六珈被寵光於再世狄綸五采昭軌範於一門寵賁下泉慶縣奕世康熙三十年歲次辛未八月

三等伯爵提督殉難加贈太子少保諡忠毅王之鼎碑文朕惟國家崇獎臣誼凡將帥之士能宣力疆場捐軀赴義者褒卹有加典綦重爾王之鼎性資樸茂智畧深沈自作鎮京江著有成績屬西南違命移鎮兩川蜀道崎嶇蛇豕未戮爾志存殲寇期報國恩聞命戴星鼓行而進賊勢初却旋即狡焉思逞爾慷慨誓激我士氣迄賊窺睥睨猶能奮擊突圍被陷之後誓不絕口嬰禍毒慘朕心惻焉今氛祲全消節烈炳著特命所司加恩追贈諡以忠毅嗚呼惟爾精誠貫於白日與城存亡義不返顧有臣如此忍令湮沒弗彰用勒貞珉永表風烈爾後人尙其承休無斃哉康熙三十年八月十一日立

康熙三十年九月初九日皇帝遣禮部郎中黃茂諭祭故誥封一品太夫人那喇氏之靈曰朝廷弘錫類之恩典均存歿臣子著靖共之節榮被庭闈爾那喇氏乃議政大臣經筵講官刑部尙書加一級圖納之母爾子歷任有年勤勞厥職推原家訓宜賁彝章特頒諭祭以光泉壤爾靈不昧其欽承之

奉天承運皇帝制曰國家思創業之隆當崇報功之典人臣建輔運之績以施錫爵之恩此激勸之宏規誠古今之通議爾二等郎蘇性資端亮才識宏通簡侍禁庭恪慎無慚於職守宣勞左右夙夜克矢乎寅恭任用有年小心益勵服官匪懈歷試能勤欣茲慶典之逢宜沛恩綸之寵爰頒新命以示褒嘉茲以覃恩特授爾階光祿大夫錫之誥命於戲推恩申命爰弘獎於忠貞樹德懋勳尙益勤於篤棐祇

服朕命勉盡乃心康熙九年五月初六日康熙三十年十月□□日
孝□婦叔穆祿氏孝長孫佐領三等侍衛阿爾泰次孫承襲公拉爾
泰三孫長保住四孫佛僧保五孫閭保住謹立

康熙二十八年十月初五日皇帝遣禮部右侍郎多奇諭祭故太子
少師內大臣三等公佐領飛揚俄之靈曰鞠躬盡瘁臣子之芳踪卹
死報勤國家之盛典爾飛揚俄性行純良擢內大臣敬慎厥職方冀
遐齡忽焉長逝朕用悼焉特頒祭葬以示憫惻嗚呼寵錫重壚庶沐
匪躬之報名垂信史聿昭不朽之榮爾如有知尙克歆享康熙三十
年十月吉日孝妻叔穆祿氏長男佐領三等侍衛阿爾泰次男承襲
公拉爾泰三男長保住四男佛僧保五男閭保住等謹立

奉天承運皇帝制曰褒忠表義昭代之良規崇德報功聖王之令典

特頒恩命以獎勤勞爾三等阿達哈哈番加一級農泰性資端謹才識宏通初列官階克著勤勞之績爰膺任使彌昭敬慎之忱奉職有年小心益勵崇班洊陟歷試無愆欣茲慶典之逢宜沛恩綸之寵茲以覃恩特授爾階資政大夫錫之誥命於戲恩推自近乃弘獎夫崇階業廣惟勤尙克承夫寵錫欽予時命勵爾嘉猷初任二次征湖廣時於保慶府首先登進遂克其城故授爲拖沙喇哈番二任授爲拜他喇布勒哈番三任授爲拜他喇布勒哈番兼一拖沙喇哈番四任授爲三等阿達哈哈番五任補授倉州城守尉六任進湖廣江西雲南等處因著有功績授爲二等阿達哈哈番世襲罔替康熙三十年十月十一日妻富察氏立

皇清光祿大夫內大臣一等精奇尼哈番加一級諡果壯吳公碑國家起自東陲創興大業折衝禦侮資師武臣之力居多而賞功酬伐

爰乃苗裔生則有祿位之榮歿則有封諡之典恩至渥也公生而英敏年甫九歲太祖高皇帝即擢爲近侍比長魁梧有膂力以知遂屬以兵事且分隸漢俘千人例視一等大臣每遇征伐必爲前驅披堅執銳所向有功攻遼東首山先陷陣征董奎回兵時探知察哈賴踪跡同八都統每一大臣前去先追及敵兵後衆到齊擊戰時又首先殺進取寧遠未克回兵時有漢兵追尾而來埋伏擊之攻囊努克時有敵軍馬步百餘人將我差人一名活拏擄去追及俱殺之救回差人有佐領薩譚下一人刺傷二人奔入太祖宮殿公手執之太宗文皇帝時征朝鮮國後有二卓爾璧帶領婦女逃遁追及俱殺之初次征北京進邊之日擊三屯營時獨出衆人之前至北京之日與袁巡撫兵對戰前傷未愈先入擊戰後二次征北京時率領前鋒從昌平前去北京埋伏二次兩次遇敵兵直擊至城下二次前去北京埋伏遇黑副將兵擊敗之又擊敗祖總兵自蘆溝橋往良鄉進發遇敵兵

直抵至步兵營敗之後寧遠馬兵至城突出擊戰時首先衆人追至城邊斬殺甚多又鄂碩蘇爾德在良馬山被敵兵追來從旁擊入斬殺填溝濠甚多征錦州時有錦州兵出城擊戰首先殺入擒獲副將大廳一人三次圍錦州擊松山兵馬時對擊敗之過北京征山東時在豐潤等縣擊敗范軍門時二次擒獲遊擊一員三河等縣擊敗蔣軍門兵二次在青州府擊敗八總兵官兵丁時率領前鋒先擒獲副將一員擊敗吳總兵時率八旗前鋒先擊敗之順治年間公取前屯衛擊敗寧遠撥兵得明季時至山海關擊敗流賊追至慶都縣地方率本都統擊敗之追趕滕機思時率兵先至吳禮雅素泰河邊斬其哈爾哈布顏圖秦濟擊圖謝圖漢率領護軍兵丁首先殺入公每臨陣冒矢石奮不顧身大戰獨戰數十次功皆居最起家由佐領歷任內大臣世職則由拜他喇布勒哈番累加一等精奇尼哈番以太祖配郊覃恩晉二等伯爵後坐事削止留一等精奇尼哈番以康熙四

年四月初二日卒上念勲舊詔易名建碑如例嗚呼公以一生汗馬
勞績荷四朝知遇殊恩攻必取戰必克雖古之名將何以加茲今公
子郎坦持誥命索文於余謹撮其梗概勒之豐碑庶垂示後昆知所
效法固所以紹先烈報國恩云銘曰絳灌興漢鄂鄖肇唐維公偉伐
竹帛輝煌佳城牛臥華表鶴翔用勒貞珉永以垂芳經筵講官東閣
大學士兼吏部尙書加一級孝昌熊賜履拜撰經筵講官文華殿大
學士兼禮部尙書加一級桐城張英拜書光祿大夫議政大臣領侍
衛內大臣滿洲都統火器營都統昭武將軍安北將軍前鋒都統世
等精奇尼哈番兼佐領加二級男郎坦立康熙三十年□月□□日

陣亡副都統兼佐領拖沙喇哈番諡忠毅邁圖碑文朕惟人臣以忠
勇自奮効力疆圉盡瘁不辭勞久著生則邀章服之榮歿則厚節終
之禮此朝廷酬庸之盛典卹下之弘仁也爾邁圖素裕韜鈴式昭果

毅整王師以戮力克懋壯猷偕羣帥以徂征夙資偉畧當風清山左
賈勇先驅逮檄布天南摧堅深入□□奮戎行之績七閩揚敵愾之
威材擅干城擐甲則疊聞凱奏班居宿衛執殳而畢殫忠忱撫歷歲
之勤勞常念馳驅之烈畀再傳之爵秩用彰戰勝之功方竭力于行
間遽隕身于王事成勞具在軫悼良深壯節猶存優崇宜及是用錫
之祭葬被以恩褒報厥□□諡曰忠毅嗚呼豐碑日麗永流泉壤之
光宅兆雲凝恆煥松楸之色丹心不泯榮膺此日絲綸寵命長留名
炳千秋竹帛康熙三十一年三月二十四日立

奉天承運皇帝制曰褒忠表義昭代之良規崇德報功聖王之令典
特頒恩命以獎勤勞爾二等阿達哈哈番加一級齊林布性資醇謹
才識淵宏懋延世之恩克承先業篤象賢之誼無忝前徽奉職有年
小心益勵崇階洊陟歷試能勤欣茲慶典之逢宜沛恩綸之寵茲以

覃恩特授爾階資政大夫錫之誥命於戲恩推自近乃弘獎夫崇階業廣惟勤尙克承夫寵錫欽予時命勵爾嘉猷初任襲父二等阿達哈哈番二任今職康熙三十一年五月初一日立康熙歲次庚寅季春穀旦長子德保次子施保敬立

奉天承運皇帝制曰揚名顯親爲子者願以令德歸之父考績褒賢教孝者宜以高爵作之忠是用推恩特申休命爾布爾凱乃佐領加一級郭禮之父義方有訓式穀無慙念爾嗣之勤勞旣克家而報國俾爾澤之昌大爰錫類以昭仁茲以覃恩贈爾爲通議大夫佐領加一級錫之誥命於戲教誨爾子永勿忝於家聲聿修厥德尙無負於國恩欽承寵命慰爾幽靈制曰國體勞臣必溯源而沛澤家崇喆孕爰歸善於厥生盛典維新壺儀愈著爾佐領加一級郭禮母俄昭氏幃範克端胎教居身教之先慈訓惟勤能愛在能勞之後宜沛貽封

用昭母德茲以覃恩贈爾爲淑人於戲子情罔極感顧復而敦孝國綸普被念劬勞以疏榮嘉乃恩勤褒其遺範康熙二十七年十月二十三日康熙三十一年八月十三日孝男佐領郭禮長孫三等阿達哈哈番穆良安次孫護軍校鄂令安等謹立

奉天承運皇帝制曰烏府階崇朝著實瞻乎邦憲多冠秩峻官聯首挈夫王綱式賁新綸用嘉懋績爾都察院左都御史鑲紅旗漢軍都統加四級于成龍操修端謹學識宏通正色立朝克勵公忠之節潔身率屬還彰蹇諤之風振國紀以森然殿中執法肅朝儀而儼若柱下垂紳允諧司直之名宜有酬庸之典茲以克襄公事特授爾階光祿大夫錫之誥命於戲孝憲貞度方嚴益勵夫霜標激濁揚清端亮尙符於風采承茲譽命勉乃嘉猷初任直隸永平府樂亭縣知縣二任順天府通州知州三任江南江寧府知府四任江南安徽按察使

司按察使五任督理高寶等處下河事務六任巡撫直隸等處地方
管轄紫荊等關宣府一鎮地方密雲等關隘贊理軍務兼理糧餉都
察院右僉都御史七任都察院左都御史八任今職制曰職重上卿
地道合含章之譽禮崇內則家人彰順位之功爰嘉壺儀之修用晉
國恩之錫爾都察院左都御史鑲紅旗漢軍都統加四級于成龍妻
李氏克勤懿德式資良猷合志相成奉公忠之茂績同心交儆樹廉
正之休聲令軌攸昭褒章載沛茲以爾夫克襄公事贈爾爲一品夫
人於戲風著素絲佇助良臣之閱閱芳流彤管敬承宸陞之絲綸嘉
爾德音賁茲寵命制曰臣忠體國靖共裕乃謨猷婦順宜家貞靜昭
其似積爰嘉令德宜沛鴻爾都察院左都御史鑲紅旗漢軍都統加
四級于成龍繼妻周氏秉性端莊持躬淑慎組紉執作纘內行以重
輝珩珮和諧佐清操而煥美前麻克嗣寵命宜頒茲以爾夫克襄公
事封爾爲一品夫人於戲壺敎相承允著坤闈之範綸章載錫均邀

天室之恩懿則丕昭榮光祇服康熙三十一年九月初三日

奉天承運皇帝制曰位列崇階作忠由於移孝業隆嚴訓資父所以
事君念茲堂構之貽厥有絲綸之賁爾于得水乃都察院左都御史
鑲紅旗漢軍都統加四級于成龍之父躬裕懿修世推淳德澤流弓
冶裕家學於庭幃慶衍門閭亮天工於邦國令名允稱殊典庸加茲
以爾子克襄公事封爾爲光祿大夫都察院左都御史鑲紅旗漢軍
都統加四級錫之誥命嗚呼一經迪後式傳報國之忱七命沾恩益
著象賢之美欽承休寵用獎嘉謨制曰職重期班宜溯源乎內訓功
崇王國尤歸美於母儀式獎芳規俾承休寵爾都察院左都御史鑲
紅旗漢軍都統加四級于成龍母王氏名成令善質秉柔嘉七誠早
嫻流徽聲於婦職三遷足法著慈教於卿材令問夙彰洪施宜沛茲
以爾子克襄公事贈爾爲一品夫人嗚呼鸞書錫慶伸烏哺之私恩